

Util

Na Hulanda, bo sa tende ratu ratu ku e Kódigo di Corporate Governance (hulandes), bon mirá no tin sentido. Kiko tin ei tras? E Kódigo hulandes tin un otro área di funshonamentu ku esun di Kòrsou, St. Maarten i Aruba. Na Hulanda e Kódigo ta konta solamente pa empresanan kotisá na bolsa (esakinan ta mas o ménos 150). Den Karibe Hulandes, e Kódigo ta konta solamente pa entidatnan ligá na gobièrnu (pa hinter Karibe Hulandes midí, esakinan ta den kareda di 300). Na Hulanda, apesar di e alkanse di aplikashon limitá, práktikamente hinter mundu empresarial mayó ta mantené e Kódigo tòg. De echo por papia di un funshonamentu kompletu. Dikon e ora ei, tòg tin hende ta haña ku e Kódigo na Hulanda ta sin sentido?

Esaki ta pa motibu ku hopi biaha empresanan kotisá na bolsa ta empresanan internashonal. Mayoria biaha nan ta mará na mucho mas kódigo di corporate governance ku solamente esun hulandes. E Kódigo hulandes ta duna hopi balor na kontinuidat di e empresa i na un konsiderashon balansá di interesnan di tur stakeholder. Legislashon i kódigoonan anglo-merikano ta pone balor di akshonista pisa mas. Tin biaha esaki por bai a kosto di empleo, durabilidad i corporate citizenship. Esakinan ta asuntunan ku hustamente den e Kódigo hulandes ta sumamente importante. Dor di fushon-, traspasonan, etc., empresanan stranhero ku (tambe) ta kotisá na bolsa hulandes, por komosifuera 'shop' entre kódigoonan aplikabel. Si un empresa hulandes kotisá na bolsa, den su relato anual ta pone énfasis riba durabilidad i kontinuidat di e empresa, e ora ei despues di un traspaso kosnan lo por bai kana otro gewon asina akí. E ora ei den e mesun empresa ei ta bai solamente pa oumentá balor di akshonista. Maske esaki por ta e kaso, segun mi e no ta redusí utilidat di e Kódigo hulandes. Di pursi, ta hustamente e frekuensia haltu den kua otro empresanan na Hulanda tambe ta sigui e Kódigo – kòrda bon ku esaki ta sin obligashon – ta demostrá ku komunidat ta mira e prinsipionan ku tin den e Kódigo komo korekto i nesario.

Ademas, e efekto útil di un kódigo bo ta mira serka nos den Karibe Hulandes tambe, apesar di e echo ku, ku eksepshon di sektor finansiero, apenas ta apliká esakinan den mundu empresarial na Kòrsou. Serka nos bo ta haña un otro efekto. Pa un par di aña kaba t'asina ku na Kòrsou i St. Maarten, despues di un cambio di gobièrnu tin konsiderablemente ménos kaos den e huntanan di komisario di entidatnan ligá na gobièrnu ku na Aruba. Esaki ta pa motibu ku un retiro kolektivo di e hunta di komisario, solamente pasó esaki lo mester tin un sierto koló polítiko, no ta posibel mas. Pa kada retiro proponé, mester di konseho delantá, a base di e Ordenansa Sentral Corporate Governance, di parti di e Konsehero Corporate Governance. Aruba no konosé e sistema akí. Aruba no tin un Kódigo di Corporate Governance ku ta funshoná bon tampoko. Na Aruba ta simplemente manda tur komisario kas asina ku forma un otro gobièrnu. E ora ei bo mester bai wes pa purba na evitá esaki. Danki Dios esaki no tin mester mas den e otro paisnan den e parti karibense di Reino. T'asina ku e sistema kaminda ta manda tur hende kas kada biaha ku bin un cambio di gobièrnu ta desastroso pa kontinuidat di e empresa. Ke men debidamente por mira e efekto positivo di e legislashon di Governance, a lo ménos na Kòrsou i St. Maarten. Evaluashon final: útil!
